

समे — 12:25

<><><><><><>

PM Expo

प्रधानमंत्री नरेन्द्र मोदी होरें अज्ज नमीं दिल्ली दे भारत मंडपम च भारत दे सारे थमां बड्डे मोबिलिटी एक्पो 2025 दा उद्घाटन कीता। इस मौके उपपर बोलदे होई प्रधानमंत्री होरें आखेआ जे भारत दे आटोमोबाइल क्षेत्र च बेमिसाल बदलाव दिक्खेआ जा'रदा ऐ। असेंगी लोड़चदा ऐ जे अस मेक इन इंडिया मेक फॉर द वर्ल्ड दा मंत्र लेइयै अगगे बधचै। केन्द्रीय मंत्री नितिन गडकरी, पीयूष गोयल ते होर बी नेता इस कार्यक्रम च शामिल होए। इस एक्पो दा विशे ऐ सीमाएं कोला परे भविक्ख दी मोटर वाहन मूल्य श्रृंखला दा सह-निर्माण दे 6एं दिनें दा भारत मोबिलिटी ग्लोबल एक्पो, मोटर वाहन ते गतिशीलता क्षेत्र च नवाचारें ते तरक्की गी प्रदर्शित करने लेई इक अनोखा मंच पेश करदा ऐ, जेह्दे च टिकाऊ ते अत्याधुनिक तकनीकी तरक्की उपपर जोर दित्ता गेदा ऐ।

<><><><><><>

Arjun Award

जम्मू कश्मीर लेई एह मान्ने आली गल्ल ऐ जे रियासी-कटरा दे पैरा तीरंदाल राकेश कुमार होरें गी अज्ज नमीं दिल्ली च प्रतिष्ठित अर्जुन पुरस्कार कन्नै सम्मानत कीता गेआ। राष्ट्रपति द्रौपदी मुर्मू होरें इस प्रतिष्ठित पुरस्कार कन्नै उनेंगी सम्मानत कीता। एह पुरस्कार राकेश कुमार होरें गी उंदी अंतर्राष्ट्रीय प्रतियोगिताएं च उत्कृष्ट उपलब्धिएं गी दिक्खदे होई दित्ता गेआ ऐ जेह्दे च पैरिस पैरा ओलंपिक 2024 च उंदी एतिहासक कैह दे तगमे आली जित्त बी शामिल ऐ। जेह्दे च उनें शीतल देवीहुंदे कन्नै मिक्स टीम कंपउंड ओपन तीरंदाज इपेंट च सांझेदारी कीती ही। राकेश कुमार होर अर्जुन पुरस्कार हासल करने आले त्रीए पैरा तीरंदाज बनी गे न। पैहले दऊं च हरविंदर सिंह होरें गी 2021 ते शीतल देवी गी 2024 च पैरा तीरंदाज च अर्जुन पुरस्कार मिलेआ हा। गौर करने आली गल्ल ऐ जे इनें त्रऊं पुरस्कार विजेताएं च दो विजेता शीतल देवी ते राकेश कुमार होर जम्मू कश्मीर दे रौहने आले न।

<><><><><><>

PM Mann Ki Baat

प्रधानमंत्री नरेंद्र मोदी होर अपने माहवार रेडियो कार्यक्रम 'मन की बात' दे राएं इस बारी 19 जनवरी गी अपने विचार, देश-विदेश च रौहने आहले श्रोताएं कन्नै सांझे करडन। उ'आं ते एह प्रोग्राम म्हीने दे अखीरले ऐतवारें दिनै 11 बजे प्रसारित होंदा ऐ पर ऐकती खीरी ऐतवार 26 जनवरी होने करी, एहदा प्रसारण इक हफता पैहले कीता जा'रदा ऐ। एह इस कार्यक्रम दी 118मीं किश्त होग। इस कार्यक्रम च शामिल कराने लेई लोक अपने सुझाऽ 17 जनवरी तगर भेजी सकदे न। श्रोता अपने सुझाऽ टोल फ्री नंबर 1800-11-7800 पर जां पही नरेंद्र मोदी ऐप जां माई गोव ओपन फोरम पर बी भेजी सकदे न।

<><><><><><>

CS-35th UTLCC Meet

लोकें गी ऑनलाइन धोखाधड़ी थमां बचाने दी इक कोशिश तैहत्त मुख सचिव अटल डुल्लू होरें केन्द्र शासत प्रदेश स्तर दी तालमेल कमेटी दी कल लाई गेदी 35मीं बैठक दरान अनियमित जमा योजनाएं पर बंदिशसरबन्धी कनून तैहत्त सख्त कारवाइयां कीते जाने दी जरूरतै पर जोर पाया ऐ। मुख सचिव होरें ऑनलाइन धोखाधड़ी बारे लोकें गी जानकारी बनाने लेई बैंकें, सोशल मीडिया ते लोकें तगर पुज्ज बनाने आले आउटरीच कार्यक्रमें दे राएं व्यापक जागरूकता अभियान चलाने लेई बी आखेआ। उनें सब्बने सरबन्धत धड़ेंग ी गुजारश कीती ऐ जे ओह जम्मू कश्मीर दे लोकें गी साइबर अपराधिण थमां बचाने ते समुदायें लेई सुरक्षत डिजीटल माहौल जकीनी बनाने लेई किट्ठे रलियै कम्म करन। ऑनलाइन धोखाधड़ी दा असरदार ढंगै नै मकाबला करने लेई बैठक दरान सांझे जतनें दे महत्त्वै पर लोह पाई गेई।

<><><><><><>

Childern Rescued

बाल शोषण कन्नै निबड़ने लेई इक मते महत्व आले जतनें दे चलदे कल जिला प्रशासन आस्सेआ जयूल बस स्टेंड इलाके च इक बचाह अभियान चलाया गेआ जेहदे च भिक्ख मंगने आले ते बाल मजूरी करने आले 9 नाबालिगें गी बचाई लैता गेआ। जरूरी औपचारिकता गी पूरा करने मगरा बच्चें गी पूर्णवास ते समाजी एकीकरण लेई बाल कल्याण समिति दे सामने पेश कीता गेआ। जिला प्रशासन ने बच्चें दी भलाई बेह्तरी गी जकीनी बनाने लेई प्रतिबद्ध ऐ

ते भविष्य च बी उंदे अधिकारें दी रक्षा ते बेहतर भविष्य गी सुरक्षित करने लेई इस चाल्ली दे लगातार प्रयास करने दी योजना ऐ।

<><><><><><>

Snow Festival Kishtwar

स्याले दे सैलसफा गी बढ़ावा देने दी कोशिश करदे होई डिप्टी कमीशनर राजेश कुमार शवन हुंदी अगुवाई च किश्तवाड़ दी जिला प्रशासन नै कल ताजा बर्फबारी गी दिखदे होई प्रतिष्ठित चौगान मैदान च इक सभा दा आयोजन कीता। इस कार्यक्रम च स्नो वालीबाल ते सनो फुटबाल जनेह् बर्फू आले खेड्डें दा आयोजन कीता गेआ जेह्दे च लोकें बड़े उत्साह कन्नै हिससा लैता। इस मोके उपपर डीसी किश्तवाड़ होरें सैलसफा गी बढ़ावा देने लेई स्याले च होर मते आयोजनं दी योजना उपपर जोर दिता।

<><><><><><>

Announcement (Must Carry)

आकाशवाणी जम्मू दे क्षेत्रीय समाचार एकांश आसेआ कटुआ जिले लेई अंशकालिक संवाददाता लेई दरखास्तां मंगियां गेइयां न। इच्छुक आवेदक, जेह्दी उम्र 24 थवां 50एं बरें दे बश्कार ऐ, ते ओह् कटुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च द'ऊं बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल बी करना औना चाईदा। आवेदक जिला सदर दफतर दी 10 किलोमीटर दी हद्द दे अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी, मेदवार गी क्षेत्रीय समाचार एकांश आकाशवाणी पंजतीर्थी जम्मू, पिन कोड 180001 पर 15 फरवरी 2025 थवां पैह्ले-पैह्ले आइयै दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>